



KENYATAAN AKHBAR MENTERI KESIHATAN MALAYSIA

KEJADIAN PELAJAR SEKOLAH SESAK NAFAS DI PASIR GUDANG, JOHOR BAHRU, JOHOR

Kementerian Kesihatan Malaysia ingin memaklumkan susulan kejadian pelajar-pelajar sekolah mengalami gejala sesak nafas telah berlaku di Pasir Gudang, Johor Bahru, Johor pada 20 Jun 2019.

Sehingga 5 Julai 2019 jam 5.00 petang, kumulatif kes kejadian sesak nafas di Pasir Gudang ialah 1,138 orang iaitu 1,093 menerima rawatan pesakit luar dan 45 orang dimasukkan dalam wad. Pada 5 Julai 2019 sehingga jam 5.00 petang, tiada kes baru dilaporkan. Satu (1) kes discaj dari wad, dengan ini tiada kesberada dalam wad. Bagi kesemua kes yang dimasukkan ke dalam wad, tiada kes yang dirawat di Unit Rawatan Rapi (*Intensive Care Unit – ICU*) dan tiada kematian dilaporkan.

Pasukan Kesihatan Mental dan Sokongan Psikososial telah menjalankan saringan kesihatan mental terhadap mangsa. Secara kumulatif, sehingga 5 Julai 2019 jam 5.00 petang, sejumlah 723 orang awam (termasuk kanak-kanak) telah menerima khidmat bantuan awal psikososial (*Psychosocial First Aid - PFA*).

Secara keseluruhannya, pelajar-pelajar didapati menunjukkan gejala susah bernafas dan rasa loya. Mereka merasa takut/ risau akan mengalami perkara yang sama seperti yang pernah dialami dahulu. Gejala yang dialami oleh pelajar-pelajar ini dianggap reaksi normal oleh mereka yang telah melalui

pengalaman trauma. Mereka dapat ditenangkan dengan baik oleh anggota kesihatan yang bertugas.

Sejumlah 470 pelajar telah diberi intervensi psikososial dan daripada jumlah ini, seramai 231 dikesan mengalami gejala keresahan (*anxiety*). Daripada jumlah tersebut pula, hanya 22 orang pelajar daripada 11 buah sekolah dirujuk kepada pakar (pakar perubatan keluarga / pakar psikiatri) bagi rawatan lanjut. Selebihnya diberikan intervensi kaunseling. Berdasarkan sejarah pendedahan, gejala, taburan sekolah dan penilaian psikososial, tiada kejadian *masspsychogenic hysteria* dikesan.

Jabatan Kesihatan Negeri Johor masih melakukan pemantauan di lapangan. Orang ramai dinasihatkan agar mendapatkan rawatan segera di fasiliti kesihatan terdekat sekiranya mengalami gejala kesesakan nafas, loya, muntah, pening, sakit kepala, kekejangan otot dan lemah badan.

Kementerian Kesihatan Malaysia bekerjasama dengan kementerian dan agensi berkaitan dalam menguruskan kejadian ini. Sebarang perkembangan akan dimaklumkan dari masa ke semasa.

Sekian, terima kasih.

YB DATUK SERI DR. DZULKEFLY AHMAD

Menteri Kesihatan Malaysia

6 Julai 2019